

CUSSEGL GROND

Sessiun d'avust 2022

Dumonda urgenta da la fracziun da la PPS concernent crisa d'energia = crisa economica (emprim sutsegnader Gort)

En il BT dals 6 d'avust 2022 ha signur cusseglier guvernativ Cavigelli dà ina intervista da duas paginas davart la crisa d'energia actuala. Sco gia menziunà en il titel da l'intervista sa tractavi en emprima lingia da «Runals en funcziun e stivas stgaudadas». L'augment dals pretschs e las consequenzas per l'economia n'en displaschaivlamain betg vegnids tematisads en questa intervista. Quai lascha temair che la Regenza grischuna n'ha betg realisà che la situaziun è seriosa. I na va betg per la dumonda, sche nus avain il proxim enviern avunda energia u betg. I va cunzunt per la dumonda, sch'ins po anc sa prestar l'energia u betg, e tge consequenzas economicas che quai ha cunzunt per ils consuments gronds che ston retrair l'energia sin il martgà liber e che n'han anc betg in contract per l'onn 2023 (var 40 pertschient). L'Associaziun da las interpresas electricas svizras (AES) ha acceptà in augment dals pretschs da 20–60 pertschient en il provediment da basa (clientella privata). Per la blera glieud po quai anc esser supportabel. Pli precara è la situaziun dentant per il consuments gronds cun passa 100 000 kWh/onn, perquai ch'i n'è – pervia dal martgà illiquid – actualmain gnanc pussaivel da cumprar mintga basegn d'electricitad. Uschè ditg che quai è uschia, essan nus exponids ad ina rallye dals pretschs.

Sco gia menziunà qua survast, ha quai consequenzas economicas gravantas per tut quels che n'han anc betg fatg in contract da furniziun d'electricitad per l'onn 2023.

In exempel:

- Client xy cun in consum d'electricitad annual dad 1 GWh (1 milliun uras kilowatt) (correspunda ad in hotel mesaun en il Grischun)
- Il pretsch actual importa 6,0 raps/kWh (quai ch'è plitost aut)
- Il pretsch per l'onn 2023 (di da referenza: 10-08-2022) importa 56,96 raps/kWh
- Custs cun il pretsch actual (6,0 raps/kWh): 60 000 francs/onn
- Custs cun il pretsch dal 2023 (56,96 raps/kWh): 569 600 francs/onn

>>> **Ils custs d'energia s'augmentan per 509 600 francs/onn u per 949 pertschient**

Ins sto partir dal fatg che mo las pli paucas interpresas, e quai independentamain da la branscha, sajan ablas da surpigliar tals custs supplementars gigantics. Sche la situaziun n'avess betg da sa meglierar, èi gia ussa cler che interpresas ston serrar.

Las sutsegnadras ed ils sutsegnaders drizzan perquai las suandantas dumondas a la Regenza:

1. È la Regenza conscienta da la situaziun ordvart brisanta areguard ils pretschs d'energia, sco er da l'influenza che quests auts pretschs d'energia han per l'economia e per la reputaziun dal Grischun, sche p.ex. 40 pertschient da las infrastrukturas turisticas vegnan serradas?
2. Po la Regenza stimar, quantas interpresas che retiran lur energia per ils pretschs dal martgà (q.v.d. che na fan betg part dal provediment da basa), a tge bransch che questas interpresas appartegnan, sco er tge reacziuns da chadaina ch'eventualas serradas d'interpresas pudessan chaschunar?
3. Tge fa la Regenza per mitigiar la situaziun dals pretschs d'energia?
4. Tge plan d'urgenza ha la Regenza per impedir che fitg bleras interpresas stoppian serrar lur portas durant la stagiun auta?
5. È pertutgada er la Viafier retica e – sche quai fiss il cas – tge consequenzas ha quai per la structura dals pretschs e per la puschida, co vegnan finanziads respectivamain cumpensads ils custs supplementars?
6. Co sa preschenta la communicaziun, en cas ch'i vegnan prendidas mesiras per segirar il provediment d'electricitad en il chantun Grischun?

Cuira, ils 31 d'avust 2022

Gort, Favre Accola, Grass, Adank, Brandenburger, Butzerin, Candrian, Casutt, Cortesi, Della Cà, Dürler, Hefti, Hug, Koch, Krättli, Lehner, Menghini-Inauen, Metzger, Morf, Rauch, Roffler, Salis, Sgier, Stocker, Weber